

四庫全書

集部

欽定四庫全書

東塘集卷十六

宋 袁說友 撰

祝文

紹興府祈雨祝文

民有疾苦必訴之天訴之神天陰隲下民而神則依人而行也東越春夏不雨訴之天訴之神既賜之甘澤矣甫月不雨烈日所憐毒熱所剝而旱復甚於前日官惕惕於上民熬熬於下訴之天訴之神浹旬矣而雨不至

民之疾苦莫切於此也惟神血食東南救民疾苦非一  
歲月方茲旱告神念此民其肯不動心乎某守土無善  
狀固不能召神之休然百萬生靈神必不忍弗恤也運  
神之靈竭神之力告諸上帝令諸羣龍使霽霈傾靈於  
千里之內而民遂更生焉民足衣食神安血食將永永  
無替豈不休哉某敬九頓首百拜以告

謁漢高帝廟祝文

惟帝造端自漢中以作民父母漢中地入蜀部載祀不

絕則寬仁愛人陰騭此土是不惟功於昔亦功於今也  
豈惟曰猶豐沛而已敢以告至

謁漢世祖廟祝文

惟帝克復漢業盡夷羣擾晚歲得蜀為力甚難百世載  
祀民心厥惟舊思蕩平之難益綏陰騭之助此民之望  
帝其念之

謁漢惠帝廟祝文

昔高皇帝事從草創帝嗣以仁惠培植安定之創守俱

稱大功推昔仁惠為今陰佑猶為守成也敢告

謁漢昭烈帝廟祝文

惟帝克傳正統求復大業荊州既分奄有蜀漢百世之後英靈猶在蜀也今蜀土與民猶王土王臣默相陰佑敢以為請

謁東嶽帝廟祝文

惟泰華在東司主民命遠若西蜀俯來歆祀一視同仁聖之事也人生欲壽生而不傷斂福敷錫萬民所望

謁諸神廟祝文

惟神載祀永長廟食民安其居吏安其職四鄙灌燧三  
農多稷終始敷佑繫神之德

謁諸葛武侯廟祝文

惟侯間關隴谷以義制兵君臣大分百世昭明祁山出  
師中營隕星遺恨如在心事難平某稟命而來盡護蜀  
府英靈不朽永奠斯土

謁梓潼王廟祝文

廟食載祀歲月彌深四方才子謁款歸心陰隲秀民遂其文鳴長吏之願惟神之歆

謁石室文公祝文

惟公來蜀首興文治猶百世師也皇帝嘉公往績形於奎翰某實拜賜以來遠有光華公亦與有榮焉敢以此告

謁張忠定公祝文

惟公高世之節無後無前撫蜀之政流誦四傳百世之

下瞻仰先躅垂訓後人以教以掖

辭張忠定公廟祝文

公撫蜀之政視諸故府猶在也某無能為役而繼前躅  
守而勿失得善其去前後相望如面命如口誨其弘多  
矣辦香云違不敢忘德

辭諸神廟祝文

奉天子命守茲西陲閱歲維吉繫神之依奉詔而東駕  
言邁歸蒙貺受祉惟神之思拜手云違載祈永綏

謁土地廟祝文

府舍中嚴多閱歲暮環垣四周皆神之依內安其奧外樂所司奉觴告至神其監之

召赴行在辭成都府江瀆廟祝文

某涖茲蜀土首崇廟飾曰雨曰暘罔不鑒格是某為民而敬事於王王以其祐民者而祐某始終三載獲以善去王其永綏於蜀歲使屢豐某萬里遠涉俾安於行無有駭浪既及其公又及其私惟兼祐而並令之某乃心

於王不以遐二

勸農文

池州庚子勸農文

歲二月郡太守率耆老以勸耕於郊故事也太守奉上  
德意諭凡父兄子弟何敢以故事云夫民以食為天而  
農為食之原父兄子弟知之悉矣非有死亡疾痛誰肯  
鹵莽滅裂而欲化穰為饑哉太守雖無勸可也今太守  
不民之勸而惟已之責使太守有善政無矯法有寬禁

無苛刑皆因其所利而相之因其所欲而化之不奪其  
時不窮其力輕征薄取與民休息而影響於古人安輯  
之地民曰不耕太守弗信也太守承天子命以綏柔父  
兄弟父兄子弟以身之衣食而責之太守焉二者相  
依而行固不欲上作而下不應也太守敬以父兄子弟  
故而以政自勸父兄子弟其知太守意而以農自力此  
天子所望於守臣而守臣所期於民者如此其尚勉之  
哉其尚勉之哉

池州辛丑勸農文

迺故歲既旱民且艱食太守之政弗善召此一歎今尚  
何顏而見吾父老欲循勸耕故事哉愧而不言可也明  
天子寬郡國之誅俾爾郡守猶得庀職焉以與爾賑掾  
而安輯之今幸未罪逐再與父老接話言於此若終愧  
而不言則太守不職滋甚矣父老其知明天子所以惠  
爾者乎蠲減田租十九者半郡有請焉詔曰可發廩戶  
給期以累月郡有請焉詔曰可蠲直賑糴為米二萬郡

再請焉詔曰可太守恪承德意凡可為吾農地者曰寬輸賦曰倚征索曰勸認糴曰釋田訟太守何敢持此自贖以求德於吾農哉凡以奉天子命也爾毋曰太守如前所陳所以賑我而卹我與今所以誨我而勸我者亦無迺大寒而後索衣裘乎嗟夫太守今不復云云而可以古人之言告汝否良農者不以水旱輟耕信斯言也爾父老其將使子弟親戚為良農乎抑亦因噎而廢食乎利害較然太守無勸可也惟茲方春雨雪時至麴麥

在地秀實有期上承天時下盡人力歲之豐凶可預卜  
矣吾農其念之哉其勉之哉

慶元己未成都府勸農文

太守勸耕於郊集州父老迺訓迺告今至於三矣過此  
太守遂歸老乎三年爾父老相從太守情與政如一日  
有惠心心雖勦而惠弗廣有愛念念雖切而愛弗孚愧  
此身更愧爾民殆無以自恕者古人一日猶能用力於  
仁也太守三年而有愧於州父老如逴責何今以故事

三見爾父老便將萬里以別且先以繆政自訟而後以  
勸爾農夫農爾民切身事也不論而知不學而能如饑  
必食如寒必衣固不待太守歲歲以勸然切身之事必  
先愛身身安則耕可力危則無此身且無此耕無此食  
理也孝父母則享善報身自安否則陰譴乘之身危矣  
息鬪則居鄉里身自安否則刑責隨之身危矣惜財物  
則足衣食身自安否則饑寒困之身危矣戒驕惰則有  
功績身自安否則破蕩困之身危矣四者爾知所擇則

身安然後可以耕可以獲得以食得以飽矣爾不知所  
擇則身危然後不能耕不能獲無以食無以飽矣太守  
不以爾農勸而以爾身勸蓋以農之本者勸爾也太守  
歸矣爾父老母忘此言毋危此身父戒子兄告弟曰今  
袁太守且東去可以與太守別而不可以忘太守言子  
與弟常能守太守言則如常在太守側矣嗟乎爾父老  
果能以此諭子弟乎詩不云乎中心好之曷飲食之此  
昔人愛賢之語太守之愛爾父老者亦如此爾其念之

祭文

祭尤尚書文

天祐皇家必有與立迺生賢者左右培植朝有大政俾  
為著龜民有常心俾為父師其身也榮其國也治高山  
仰止流光萬世公之清節不以利疚事或過舉賴以正  
救以下廟上凜然東臺至再至三抗奏弗回公之摘文  
兼麗典誥綸掖代言玉堂敷號史廷直筆帝幄橫經黼  
黻王度儒臣至榮羣書萬卷山藏海積公博極之章句

臚析繭紙舊聞千載散佚公愛玩之寶於金玉嗚呼哀  
哉以公之節足以鎮俗以公之文足以華國讀書是勤  
百氏指南樂古為富四海律貪比正嫉邪友舊篤親皆  
盛德事具有典型天子眷乎舊學學者依乎宗師將彌  
綸乎廊廟均仁壽乎華夷何聽履之方強條逝川乎已  
而嗚呼哀哉上而公議孰主張之下而善人孰領袖之  
斯文不幸殆如綫矣舉世混淆誰能變矣識與不識莫  
不涕洟吉人云亡將誰與歸小子辱眷接武朝蹟一再

姻婭聯好膠漆聞公易簣我嘗視之及公蓋棺我實撫  
之實肴於豆實酒於卮為斯文慟九原莫追公而有知  
鑒此奠詞

祭唐參議文

嗚呼哀哉我思古人逮於中興故家人物夙如參辰不  
見君子尚思典型嗟嗟元明儒服之英維公大父相於  
承平家傳有學世濟厥聲前言往行典故章程叩之不  
窮灑灑可聽高古之文得其全淳韋編三絕獨識其真

一官州縣惓惓在民弗詭弗隨枉尺直尋六十九年有  
韞莫伸一夢不覺失此老成我輩從公道合意親論文  
有社尊酒有盟云胡逝川奪我善倫饋奠悽然涕沾於  
巾公其有歸鑒茲哀陳

祭池州王都統文

天之生才蓋將以幸當世而人之負才又豈欲僅見其  
一二耶使天而有意焉則才固不以輕畀有才而遽奪  
之則天理殆未可以數計也嗟公之生世濟厥美蚤焉

以詩書而自奮而拳拳用力於舉子嘗一試於文闈竟弗能以遂志慨父書之可讀迺投筆以從事顧其文足以自立而武則果敢而勇毅出把州麾入環禁侍輿論為之嘉仰而上意之所眷倚茲盡護於江屯甫僅周於一歲於軍情乎練達而戎功之必備譬之嚴父慈母以臨子弟而吏士肅然莫不畏威而懷惠蓋天之所以予公者必有意而公亦知天之所以予我者而日親之將以身任天下之事而不肯自己是何一旦遽以一疾而

不能起也豈天之所付將泛然其為戲也抑天下之事  
有不可以意揣而公之云亡適不幸而致耶不然胡奪  
之遽使之僅見一二而遂至此也嗚呼哀哉予於醇父  
昔未瞻際維故夏之六月偶一見而倒屣曾未浹辰公  
已來帥我亦僥踰繼叨郡寄相從幾年警愛備至公有  
疑而必問我有請而輒詣相與洞然而無間務脫略乎  
苛細方將以異日之事而望之乃一夢而遽蛻雖死生  
旦暮之必然而獨醇父之亡殆識與不識皆為流涕也

嗚呼醇父不可見已所可見者遺像在堂遺編在几拊棺慟哭以致奠醕醇父有靈鑒我哀酌

祭趙主奉文

公之為人信厚可親志不苟得義不苟身傲睨富貴蕭然絕塵公之閱世為今舊人醞藉風雅典型可遵歸然靈光曄曄有聞公之樂善得於性真所遇必施莫非善因蟲魚之微愛之則均公之有子賢哲粹純以文華國以才牧民為君子儒如左史循若昔壽考曰德與仁公


具衆美百年盍簪一夢不覺俯仰莫詢宗老無幾士為  
酸辛噫嘻吾邦民方告貧賴公賢子拊摩屈伸有瘼必  
察有惠必陳千里晏然如物在春我輩受屢懷德弗泯  
維父之美維子之珍公雖云亡垂裕益新酌觴告訣涕  
零沾巾

祭葉夫人文

嗚呼夫人之壽八十二年始憂而勤百未一全終貴以  
逸五福粲然昔別駕公其亡逝川夫人方壯諸孤滿前

二子一幼六女後先夫人曰吁淚下迸泉何以為家立志在堅靜以樂貧儉以給饘閉門撫穉朝餐夕眠女也及笄選壻有連門闌一時衣冠闐闐維時貳卿韶齟童顛夫人撫之我其女憐始於嬰孩而教已專及其能言訓督益虔擇師惟良無愧三遷譬如美玉既琢既鑄宗廟之器瑚璉璧琄揚鞭宦塗華策以蹇踐揚中外聲實四傳溫詔還之擢登禁聯夫人悅之曰予子賢我顏以懌我志以宣天子嘉之渥恩自天曰母之訓爾惟弗愆

夫人懷歸安於故廬田園笑傲燕樂周旋七年里門壽  
考綿綿夜旦推移微疾偶纏我書問安亦云小痊迺歲  
之杪一夢弗還我為諸甥荷意拳拳疇昔侍誨如母存  
焉離違八稔迹如天淵孰知此來拊棺涕漣歌此奠詩  
舉我一邊



東塘集卷十六

欽定四庫全書

集部

東塘集卷十七

詳校官石中允<sub>臣</sub>薩敏

主事<sub>臣</sub>呂雲棟覆勘

謄錄監生<sub>臣</sub>汪本中

謄錄監生<sub>臣</sub>溫廷鑑

欽定四庫全書

東塘集卷十七

宋 袁說友 撰

啟

賀兵部王尚書啟

竊以聖天子千載之遇若時明良大司馬九伐之權畀  
我英傑惟威望四馳足以傲睨於當世則孚號一出是  
以度越於諸公益天意人心之既同宜位貌班聯之益  
峻聞者胥懌翕然同辭當國家治平之秋暨疆土全盛

之日上則垂拱無為以聽萬物之自治下亦精白承德而惟故事之奉行方是時也蓋得人為無難願在列者雖寸長而亦可居今之事實大不然中國之可復而欲行未前之勢常忽而弗之思內治之益修而棄本齊末之風知敝而莫能改悠悠歲月之逝泯泯山河之歸拊髀空嗟挺身亡有竊思今日之大舉豈曰中材之可能必有當代英傑之儒乃副吾君神武之略漢高謂吾用人傑所以決劉項之得失李尋謂朝有英雋所以致精

神之折衝彼衛綰石建之輩何能起中葉之衰而鄭綱  
德興之徒烏足掃淮西之僭故當大有為之主必得不  
世出之臣威名氣焰之所加外敵強藩之自服非此無  
與計事者而吾何愛千戶哉蓋自古人主以待非常之  
才豈務惜美官以拂具瞻之意係國休戚為時重輕惟  
今此除滿衆所願仰惟某官以身許國而有直方以大  
之操以道致君而無卓絕行難之慮為儒者病於泥古  
則大言無當而不通負才者急於稱功則小有所成而

復失孰若內通世務而儒以効著外應物變而才與氣  
全昨聞季子之來歸上歎嚴君之見晚疊疊傾河之議  
決千載之事於片言惓惓貫日之忠信九重之知於一  
見洊歷中外顯揚勲庸破拘攣之見而斥虛文植遠大  
之模而略近效潛制敵國用綏邊庭貪夫之所深忌而  
鎮以弗疑庸人之所苟安而期於必濟逮此在前之節  
益殫劇上之勤凡納約自牖之間有感激回天之論指  
山川於掌上固無聚米之勞吞雲夢於胸中獨抱投鞭

之志憤國蒙恥如身納汙使主上不忘於克復而未可  
輕復必將建長策於萬全使天下各志於功名而無事  
於虛名相與集大勲於一舉厲丹衷而思奮蹈白刃以  
弗渝孤蹇百執之中獨任一人之責用能朞歲浸被九  
遷亟長夏官更仍夕拜惟周六卿之任在漢五曹之兵  
自非驚代之人豪孰對司戎之上寵昔史氏有建都之  
論而吳人從飲水之謠在今揆策以圖全當使有進而  
無退稍務經理以須奠居可以作士氣於方張示國人

之所嚮將制梃以撻彊楚殆折箠以鞭赤眉惟公一身  
濟此大業九州千七百國之盛謀無弗成中書二十四  
考之榮茲焉可卜某固不專以閣下逢時為深慶而獨  
竊謂公朝用大之可為譬之未病者雖中醫調適而可  
瘳已病者必上智救療而後可上方盱食以興念士亦  
彈冠而樂從然餘子碌碌以因人小才沾沾而自喜天  
將降於大任人獨仰於明公永言孤蹤久辱眷寵八載  
朝行之幸六叨除目之恩弗虞滿盈迺負疚疾念自絕

於清貫或少殄於殘疴偶茲更生以際盛事枝辭所禱  
精縕奚宣

賀魏樞密仍兼叅政啟

恭審樞庭擢貳式隆宥密之權政路聯華兼贊彌綸之  
任顧本兵之寄以人而重宜長城之衛無日不然詔綍  
四馳士氣百倍伏想慶慰竊以安不忘危治不忘亂實  
人君保泰之基見於未兆防於未然蓋臣子沈謀之術  
仰惟今日深軫昔時不以修和之暫而自安於奠枕之

休不以納約之堅而遂怠於覆車之戒當匈奴之入盜  
顧文帝何以為安昧吐蕃之詐盟縱馬燧亦將焉用事  
若可恃而不必慮迹則甚詭而尤足疑方聖天子宵旰  
而念此則百執事胼胝而敢辭况在鴻樞益顯戎政修  
車馬備器械固有攸司進惟幄坐廟堂莫隆右府惟樞  
機貴周密之有素則邊鄙無隙間之可投齊用晏嬰遂  
獲折衝之效漢得汲黯無愧發蒙之譏是皆潛制敵謀  
靜度事變此天下所以常寧而不擾而忠臣所以可用

而不誣課此偉功屬我君子恭惟某官蘊八元之善樞  
十亂之功文章莫與之爭能如飛羽號萬人敵言行惟  
當之為貴蓋夷惠稱百世師瞭然當世之著龜卓爾時  
人之耳目勲藏明府名簡上心郎闡宗寺之華宣幕螭  
頭之貴兼判四戶典職三銓繼進長於天官遂特封於  
瑣闥翔清禁勸講邇英勞大者其位隆已司樞筦器  
博者其用遠復預政機載惟清朝尚虞多事講信修睦  
雖曰誓為百年可信之期思患豫防宜有不敢一日自

安之志歷觀政弊實蠹治原拱手糜食而士卒習以為常肥已瘠人而將帥殊不知畏每培軍俸嘗致怨言或給以楮幣而困於虧陌之支或代以敗繒而劣於見金之獲主兵者不一歲而輒易被堅者雖百戰而靡酬穀無半歲之儲糴有橫徵之迫要當深戒而痛懲烏可有名而無實至於闢荆襄之壤不如召募而使耕總淮漢之屯孰若選掄而久任事之大者莫過於此推而行之存乎其人肆茲儒苑之英來贊籌帷之密得時則駕見

義必為惟有德既進則朝廷自尊顧中興之功可日月  
以冀如雷霆如河漢行觀麻案之宣作霖雨作鹽梅即  
慶槐庭之拜伏念某身無可喜居有甚憂分薄命之當  
然豈尤人之敢泥側聆顯制喜切懦衷諒賡康事之歌  
願賦得賢之頌欲致平治非我公而其誰獲見休明顧  
吾屬之何患有文書而銜袖掃門仞以曳裾豈徒借盛  
事而言抑亦為斯民而賀過此以往未知所裁

賀蕭參政啟

恭審疇咨人望叅秉政機在甘泉從橐之班昔無出其  
右者維中臺大政之柄茲故舉而授之清明之朝小大  
以懌竊以時雨將降山川所以出雲吉事有祥國家由  
以興治惟動不應有開必先審象而求固已兆商宗之  
夢卜獵而吉是將協周王之占仰惟東海之蕭實在大  
江之右五百年間世而出多士以為儒宗三十字獨對  
之餘一鳴而亞舉首天意密見謠言浸孚沙洲之漲夫  
豈徒哉庸知必相金甌之名則其覆矣斯拱而須既登

我公爰定斯識諒其得宰輔之位必於其天至於使朝廷之尊咸曰有德時固有待邦其以寧恭惟某官行直方大而全地道之光以智仁勇而兼天下之達蚤以東南之人物獨收鼎甲之科名色正芒寒文蔚以華其國雷聲殷默言出而加乎民方二十年樂於退而弗之求蓋一二公勉其來而莫肯顧儲此碩望揚於薦書身致雲霄於以動凝旒之聽轍環臺殿殆將伴文石之班冠冕細纒之儒衡尺斂板之仕未有四緊之首而不兩地

之歸以此而卜淵衷知公必且大拜爰出綸綍峻登廟堂顧瞻漢庭是無以易堯者夾輔王室吾其為東周乎一舉之初衆聽所屬惟聖主以得賢而頌而大臣必事君以人何世而不生材必有優游於諸野公道豈無任責定知恢拓於崇朝使卑辱與渫者而升本朝則廣大樂易者足稱上意願以愚慮之得首於王前之陳愛國士而追亡非鄼侯孰計其事選拾遺於左右獨望之實忠其謀聳觀規撫其在孫子上方登老成之佐臣洪尚

竊遲之天之欲平治斯民弱翁且大用矣相此興運訖  
其遠圖伏念某所立甚孤其衷特早念昔門牆之旅進  
居然歲月之最深况席間函丈之密依蒙坐上千人之  
小異謂其於文字而可教情則父兄若其捐勢位以辱  
知過於子弟偉制除之誕布慚賀諛之莫陪與榮在斯  
不寐而喜

賀錢叅政啟

恭審政地虛席錫命在諸公之先儒英得時贊元更二

府之柄爰以食前借箸之任庸慰海內望霖之思上意所默定而今迺見之士類相與言而恨其晚爾聞者胥悅翕然同辭竊以儒者之道純然如穀粟之在人皇王之興未有棄詩書而能治或者未效指為甚迂豈一時人主之弗思實當世士夫之自取漢高祖以腐儒敗事至子房之用則為帝師司馬懿以俗儒為言至孔明之才則稱俊傑故識時務者迺儒之實而謂書生者特儒之名有夫子之德而侵疆歸得仲舒之醇而膠東治使為士

每先於實用則時君何忍於棄才熙朝清明吾道振起  
主上韞大有為之志相公負不世出之英相得益彰正  
論斯立揭之正鵠示天下所以趨詔曰真儒至聖人而  
後定春秋之褒一字仁義之效四馳侈茲無敵之勲是  
豈以儒為戲賢者登用斯文重輕多士所以知歸舉國  
至於相慶伏惟某官天降大任民方具瞻高明博大足  
以隘宇宙而燭萬微氣焰精神足以懾戎蠻而鎮雅俗  
方其居下位之日已有致吾君之心頃歲大昕之朝竊

聞見晚之歎契淵衷於一見之頃定大用於游對之時  
勤勞百為夷險一致破拘攣之見而務大體斥虛誕之  
習而究忠謀江淮要區兵民重寄萃此二責在公一人  
潛制敵國而培不拔之基無煩縣官而竟難成之業庸  
人之所苟安而期以必濟姦臣之所深忌而鎮以弗疑  
屹如砥柱而不搖坐使頽波之復振偉矣丕績冠乎羣  
倫用能朞月之間徧儀兩地之峻

賀周侍御啟

恭審道隆致主志已叶於從龍國慶得人任果膺於冠  
多老成在位臺綱自張姦邪屏謀士氣益振當主上勵  
精之日實人臣論事之秋側聆御史之敢言願作議曹  
之獻策竊謂今日急先之務必以敵人生事為憂累有  
十萬快意匈奴之心未聞三千喋血邊庭之舉元氣不  
墮衝冒有餘彊陽雖多疾病殆至不及其本烏能有成  
方內治之未修奚外敵之可破曰弊之積請厯以陳朝  
廷將大有為而財計困以不足大司農昧其斂散之要

郡刺史安於掊尅之風求之者雖非一端用之者不勝多務既乏冢宰歲杪之制爰歎魯國年饑之傷姑述其微以伸是說凡隸科名之額必先經總之全第知多寡之數可証於文書豈謂出納之繁見敗於官吏彼有私取而私予自然不入而不供衰少致多由來者漸始也漏卮之失利去害興終焉畫餅之譏名存實廢難復宇文之校籍當思廣漢之發姦今之圭田法存王制職分勞佚頃有等差固知上意之甚公誰念弊端之已極斛

以百計非有寸壤之可耘數出一時悉以官租而盜請  
故輸納積無窮之耗量收務必倍之餘歲貢既充羨糧  
猶富可以求足盡力而為居上者本期以祿而代耕在  
官者迺有無田而得食順考上古綽著宏規軻書備經  
界之言開元下括實之令擇斯二者觸類長之苟任長  
才當得至術天子必得可用之將將軍要多益辦之能  
毋以庸才倖於一試頃歲瓜州之敗急於圖功曩者宿  
泗之行沮於吝賞繫咎之執非將而何惟亡祈父之爪

牙難愧楚王之面目縱廟堂議罪誅責僅正於臨時而邊鄙告危委任不移於旋踵豈有既廢而復用必其棄舊而謀新況夫昔日叛上之徒安得一心報國之節見韓信而具禮由乎薦士而來命李靖以談兵將欲量才而授其道可考宜鑒乎茲昔仲尼先足兵之言我藝祖大閱武之法且制衆以少者猶當車之臂以不教而戰者同血指之工今之多虞過乃由此方其杜侵攘之兵出關中之甲往往有涇原單弱之憂及其驅召募之夫

抗敵國之師比比盡神策奔馳之卒人情知可慮也執  
事盍亦圖之百人荷戈千夫仰食屬縣受弊公帑以虛  
此有唐致敗之由為後世循名之戒粵自敵人之犯塞  
即聞邊壘之興師屢閱戰攻豈無亡沒而大將小裨以  
苟得者為志則虛籍媒利仍舊數而不渝吁哉軍實之  
未明信矣邦計之久匱夏啟賞用命之士真宗錄戰死  
之孤庸示誠心式勸來者考數載之內所以攻城而略  
地則三軍之衆固多碎首以捐軀可無殊恩以恤其後

方且父母餓妻子散紛然為乞人於白晝之間徒然倉  
廩實府庫充不少慰遊魂於黃墟之下將使忠憤解體  
智勇灰心儻弗推無虐孤幼之仁吾恐有疾視長上之  
患事若甚細害實良多夫賞不踰時士則奮力而乃歲  
月之久靡聞毫髮之頒逮於招怨有言類沙上偶語之  
變則又急封媚下同榮陽躡足之時養成犯分之姦寢  
起要君之態是當勸功欲速誅罪惟明不戒履霜終見  
圖蔓加之二廣要域羣盜逞姦大者揭刃以屠民小者

椎埋而發冢幸徒黨之已獲奈種族之未殲蓋州牧多  
飾治之儒曷致小人之有恐而壁壘無應猝之備孰為  
壯士之先登宜令執銳之將臣畀以剖符之重寄至於  
吏道多端而尤雜銓曹無闕之可須待次家庭者何啻  
五六年調官京畿者亡慮數百輩故祖宗立校藝之格  
為搢紳澄入仕之源今則不然亦幸而免方公朝僅有  
可喜之事而諸生即覬無厭之恩躍然皆貢禹之彈冠  
甚者過元興之奏疏古道久弊薄俗肆行國家之賦素

列常科郡邑之供抑存正數迺萬金之貢競希一旦之名號曰羨餘本於聚斂韋堅獻終歲之積遂為天寶大亂之基玄齡上別庫之儲馴致元和晚節之禍此風既長流毒自深不明損下之愆祇重不仁之富比飭銷銅之律用嚴範噐之防烏知法出而姦生何有令行而禁止鬻於市者官府熟視負於遠者闕梁不呵孰謂雷霆之朝靡具江河之法斯皆衆務之蠹藏於萬機之微考杜牧上策之陳未臻於治冀充國先為之勝實難其

功惟整於內而外自平則齊其本而末必舉苟不察此何以禦彊時惟臺臣密贊治體抨彈攝物不為力小謀大之疎議論回天且無位卑言高之罪凡天下微有得失於筆端即與指陳大此休聲屬我君子恭惟某官以道自任得君之專至剛至大而持之以明嘉謀嘉猷而發之以勇顯顯令望為世豪英諤諤不羣有祖風烈好是正直擇乎中庸比陞烏府之崇益邇龍顏之粹箴規所達開納不忘秘殿談經王置諸其左右宸衷邁訓學

有緝於光明簡知果厚於九重清要爰班於七品邪正  
白矣不埋道上之輪風采凜然自落金吾之膽慶忠臣  
之當國仰聖主之得賢士知直道之已行人喜太平之  
可見凡厥庶政繫公一言毋使因仍以憚改作繩愆糾  
繆庶幾罔或不臧去故取新得以同歸於治克謹內修  
之念用振外攘之休以若所為夫誰與敵此日之圖回  
多事既輸陸贄論諫之誠他年之尅復中原亟被蕭何  
發縱之賞某壯無佞舌狂有赤心頃竊儒科獲登牆仞

樂儀封之請見進童子之難言茲承成命之傳倍積懦  
衷之喜時不可失倉庚猶効於一鳴人豈無知愚者輒  
攄於千慮雖微賤弗揣其分諒高明何所不容晉男子  
三十字之書儻辱京兆以聞之賜長沙傳六太息之策  
終期文帝盡用之知尚須芝檢之繼頒敢後藤牋之嗣  
布拳拳之蘊喋喋莫殫

賀王樞使啟

恭審樞庭擢使赫然酬帷幄之勲魁枋不移庸以定腹

心之寄國朝鈞文武之二柄右府列長佐之四班厥今  
元臣備此隆委道大而用莫既功崇而任則專蔽於淵  
衷克相武事竊以主上願治之切甚於調餼政路選賢  
之難幾於弄印踐阼今十七載置輔殆數十人或疇咨  
僅取於臨時莫疇注意則進退弗移於旋踵何以盡忠  
故君臣遇合古人難知宜功業寂寥後世滋甚自公枋  
用維時道行諫臣已見於事堯夢兆又符於得說環本  
兵之任蓋三載而始遷隆使範之名今一日而雙拜攷

其坐廟堂之日與夫徧樞筦之班悉踰前後之數公獨  
辦聖賢之能事天降大任邦其永寧仰惟某官忠誠道  
德之所淳涵節義聲名之所振厲不茹不吐本沈潛而  
高明惟危惟幾皆純白而洞達蚤以太上之眷擢居七  
人之聯巍然勲稱布在中外主上韞大有為之志相公  
以不世出之英相得益彰遂授以政徧儀二府弼諧一  
人惟公志不在位而在生靈忠不務名而務誠實凡所  
揆策莫非愛君鎮以靜重而培不拔之基燭之幾微而

銷未然之患子房之無智勇彼何假於得名立齡之善  
始終史獨稱其藏用是即其意之近厚皆將為國之遠  
圖爰慰民瞻遂正使號將制梃以撻強楚殆折箠而鞭  
赤眉自威名重望之所加當外敵強藩之自服九州千  
七百國之盛亶屬元勲中書二十四考之榮未容專美  
某側聽行路之語不勝舉手之歡十年未正於使名一  
日遂頒於庭告上意至此天兮匪人永維孤蹤夙被清  
顧編研一職之久辱在下寮步武羣英之間俾游雋軌

聖主得賢之頌肯容往牒之獨專大臣事君以仁咸謂斯文之有望枝辭雖罄精蘊奚宣

賀四川劉制置啟

聽履而上星辰來作坤維之重伏鉞而臨參井聿申異命之嚴爰習吉於龜占以正封於麟璽鼎新一面壯觀羣瞻恭惟某官道博以鎮浮節高而用大尊主庇民之學允合前猷牧人馭衆之才是皆餘事騎省冠七人之列龍墀首八座之班定國是於至公奇表盡屏啟君心

於當道獻納維良少遲三事大夫之聯用壯萬里長城  
之勢謀中軍之元帥誠莫踰公率西方之諸侯是用建  
長王帳初開於月峽金城增重於雪山封疆已熟於經  
行毋煩三令民吏夙諳於節制今喜再來三陸師律之  
風清六詔歡聲之雷動何待政成於五月即觀詔入於  
三台某揚輶在前依光惟切方浮游於航葦幸邂逅於  
前茅詠思而言子歸自愧魚鳧之舊相遇而適我願喜  
無鴻燕之遽攄心欲言更面以布

遠迎四川劉制置啟

伏以蠶國撫封豹旂夾道逖矣西土新建牙秉鉞之雄  
薰兮南風壯叱馭飛軒之樂惟使旌之至止適歸櫂之  
言逖迺半塗胥晤之可期蓋昔日美談之未有不我先  
不我後實幸會之匪常則心喜則心降更好言之益締  
敬憑短牘用遂前驅

賀單尚書致仕得請啟

抗疏漢庭共仰垂車之高節躋班堯閣有榮出綍之溫

言舉盛典之肇新宜士林之爭慕恭惟某官聲名久大  
德用昭明扈從甘泉獨有貞元之舊蕃宣侯國半於天  
下之區方曳履於文昌乃掛冠於神武秋官大司寇之  
職莫能留行奎文直學士之除亶為異數更褒辭之中  
出與宸畫之下臨身名俱榮始終兩備某適觀異數仰  
止清風身隔重闕愧賀賓之莫與思馳一室尚他日之  
相期

賀留同知啟

恭審詔趣間臣位登樞府昔牧人御衆無踰五十餘州  
之難今課効醕庸宜在二三執政之列天意素定人心  
誕孚靖惟今日之顯除亶屬熙朝之盛舉竊以守天下  
之至險者莫如蜀任當世之重寄者存乎人惟有誠有  
德足以深服乎其心則若兵若民翕然相安於其下韋  
臯勝敵尚貽蓋侈之譏德裕籌邊猶有終身之恨必使  
上不忤而下不愧蓋亦知之易而行之難國家繇南渡  
以來地望以西州為重銅梁玉壘號稱天塹之雄襟山

帶河實賴金城之固然或者紛張於累歲嗟異時前後  
之數公獨茲召伯西陝之功果慶留侯籌幄之拜竊觀  
四載視古無人蔽以一言曰誠與敬恭惟某官恢宏而  
博大忠厚而純明超羣言於絕識之中發聖祕於英辭  
之表泰山喬嶽儒於道以最高金鐘大鏞仁為器也甚  
重蚤被當宁之眷亟上甘泉之班登螭陛以掌絲綸繇  
瑣扉而任喉舌從臣均佚閫寄洊更以德威鎮服之餘  
弭舊染謹諱之習綱紀一振軍民並安擢從大江之西

遂授全蜀之政聲色不大有威德以服其民金石弗渝  
惟至誠能用其衆強鄰歎息以知敬諸將感勵而悅隨  
宣勤四年克己一節介圭促召旰飢對敕曾晝日之不  
移已廟堂之極邁惟今日之勢上策莫如自治而右府  
之地彊本乃能折衝汲黯用而淮南寢謀裴度相而河  
朔効順仰惟經綸天下之學於以舒發胷中之奇必將  
衆建於人材未暇披圖於輿地任國大事非公而誰某  
晚學甚庸冗材無取瞻望尚書之履尚憶趨隅睽違夫

子之門不勝僂指每幸書生之氣習夙蒙先達之獎知  
茲聽出綸至於折履情深仰斗嗟旅進之亡繇疾有負  
薪顧修辭之獨後尚以江湖之孤跡敢投廊廟之洪鈞  
秋琯方深樞庭多暇願精寢餽之衛用慰邇遐之瞻

賀留參政仍兼同知啟

恭審顯膺制綸擢貳台席其在左右方朝夕納誨而命  
之無分東西兼文武經邦之大者總此重任維時鉅公  
竊以君臣道合之難固將千載而一遇至於聖哲相逢

之易則決大用於片言惟當饋念此樂得其人雖舉國授之猶恨其晚千秋立談之頃旬月遂侯姚崇十事之陳翌日而相使其道同志合而謂不及也則將日遷月拜而尚竊遲之厥今留侯之來首覲宣室之對一見趣兩社之拜昔也則無晷月環二府之班茲焉特盛敬誦除目灼知上心仰惟某官以社稷臣為帝王佐道德文學而入侍寶右漢庭聲名智略以出藩爰倡周牧不憚蜀道之遠往專坤維之雄恃此忠誠寬上憂顧第知敦

厚以鎮俗不務表暴而近名隱然長城固已奠西南之  
四路我有良翰又將踰前後之數公勤勞五年始終一  
致是謂天下之難辦誰其能之豈有當世之異材可久  
外者延和之殿甫對政事之堂已登與其束帶而立於  
朝孰當大任何必審象而求諸野莫如明公故於滿歲  
之間亟贊萬機之重兼資者德裕武宗遂成其功既用  
如弱翁漢宣將倚為相巍然共二之佐凜乎登三之期  
隆卜世八百年其永相淳熙之治食封留三萬戶益昌

蕃大之宗伏念某所立甚孤其哀則蚤得第三十載慨  
白首何以報君投閒六七年而黃卷僅容對聖每自笑  
屠龍之拙固未忘求獲之伸竊聽尚書之履聲念疇昔  
故願侍相公之袞繡如疏遠何幸當進而論人物之時  
復在退而處與渫之日為之不樂或蒙軫念於向隅之  
夫見之恐難未敢辱身於掃門之隸茲聞庭告之號莫  
遑席賓之聯

答宏詞科倪判官啟

伏審高第詔賢雄文擢秀華聯三萼未多丹桂之芳芥  
拾兩科今見白眉之盛斯文壯矣請論翕然竊惟文富  
朝華妙觀天巧琳琅垂世獨有仙官之藏簫磬諧音時  
為清廟之奏固已上窺而下逮自然實大而聲闋摘領  
底之髭蚤已稱其易易剖胷中之夢茲益辨於多多殆  
將脫穎於十九之中何畏焚舟於再三之敵昔陳密之  
弗獲選科寧有不利耶以韓子之樂其名人或謂之能  
也古所難者公兼得之佇須鋒車芝檢之頒即慶木天

米廩之拜某言念先契夤緣下風偶忝職於文闡俾竊  
觀於筆陣英詞駭目僅逃五色之迷盛世得人共快一  
斑之覩慶緘不敏謙牘首臨惟知緹襲之藏莫盡瓊瑤  
之報

答四川李總領啟

拜恩北闕總餉西州萬里去天上每先於憂顧三軍仰  
食時方急於選掄有如望郎允矣公論伏惟某官以有  
用之學當可為之時方將屬意於功名政爾假塗於煩

劇入連制閫未勞報政於期年列戍總戎何止論功於  
足食惟皇華之遣已重在餉事之寄益專厥今民曹接  
武茲選踵此召命非公而誰某願叩龍門莫馳馬首忽  
五雲之下布曾一介之敢當謙則裕如禮云過矣地之  
相去惟不勝風馬之殊公將來歸庶幾得雲天之託

賀深陽尉章同年啟

竊以懷貞曜於唐家莫追高致得子真於相裔遂振斯  
文豈惟幸寮屬之在茲抑亦見典型之如昔敢裁奏記

難盡報投伏惟某官語有令音文推奇字萃百能於夏  
校雖賢士謂不及之奏三策於春官皆先生莫能對者  
尚塵瀛步來尉警巡豈以翰墨之工將異溪山之趣哦  
薔薇之什嘉前躅之可承對瓦屋之峯思古人而欲賦  
有賢如此公論翕然佇聞芝檢之頒即登芸閣之選如  
某者嶽崎可笑險阻備嘗偶先訓之是遵亦世科之誤  
玷拜恩紆綠獲附名經莅職勾朱復聯王事謹簿書而  
待期會已亡補於縣官震風雨而知帡幪政有望於君

子

回發解五人啟

程能秋貢偕計春官咸歆稽古之榮遂見起家之盛伏以解元先輩言皆中律義必據經尊其所聞居務古人之學求為可用弗專舉子之文蔚以詞華來由詔選高山流水世豈乏於知音美玉精金今果稱於定價妙語一出蜚聲四馳某偶幸觀瀾繆當勸駕三冬足用願無憚於膏焚一鳴驚人嗣亟聞於芥拾

回知普州李大著啟

六十部之撫封濫將上指二千石以分治幸託官聯愧  
告至之未遑荷馳緘之先辱伏惟某官令名四出偉望  
千能岷蜀騰芳白雲耀西山之秀瀛洲接武青藜輝東  
壁之光盍晉荷囊尚需剖竹豈特居官而可紀蓋將更  
治以考功坐令閭里之間不覺朝廷之遠故鄉地近已  
同衣錦之榮飛詔天臨即上鳴鸞之直某驅馳萬里冒  
昧一來可毋忘文字之交不止問簿書之事惠而好我

正惟同氣之求言以贈人尚賴多聞之益

代人賀魏左史兼中書舍人啟

恭審超登螭陛亟踐綸闈疏報功崇德之恩天子為之  
親擢總載筆代言之任儒者極於至榮朝廷既尊中外  
胥賀恭想慶慰竊以禱祝之文則史實先記事之功帝  
王之制可行尤重贊書之寄若稽於古則執簡而肆筆  
極言其效則出綽以如綸載惟二者之兼司率本九重  
之善任利見大人以正也無非清切之聯不有君子其

能乎果慶選掄之中乃知今日之事足為下執之榮恭  
惟某官道大而有容德博而不倚六律奏笙鏞之間百  
花榮崑閬之英韓柳為時宗工蓋五百年之名世遷向  
視古通達貫三萬軸之全書文章覩天巧之深議論爛  
日光之照蚤躋膺仕即簡上知星曹薦易於郎闈月寺  
亟司於宗牒丕闡立朝之譽益彰致主之勲當國家思  
內治之修政外敵伺吾邦而舉聖主未遑他務念并州  
宜以勲為先人臣各致其能顧淮陽徒得黯而重爰雍

容於宣幕務參畫於廟謨折衝既効於精神專對聿勤  
於麾指萬里而展屬國大昂昂聳壑之姿片言而警楚  
王笑碌碌因人之輩輕一身於虎口等九死於鴻毛第  
知蹇蹇之匪躬迺見多多而益辦共慶單于之啟慕咸  
欣唐儉之來歸大對聞天信中朝之第一貴名起日真  
國士之無雙致命弗辭論功可後寵符僉議恩出至公  
參聯豹尾之班密勿龍顏之粹存隱晦顯微之意有舉  
必書追聲牙幽眇之風以宏斯道佇拜芝書之賜即真

荷橐之華方一佛出世之時已觀盛事逮貳公宏化之  
日更展嘉猷伏念某冷落一官貧窮萬狀張融之無居  
已久何殊焚次之傷淮陰之寄食未忘殆類畫墁之計  
望龍門而旅進欣燕厦以知歸寸心所祈尺紙難盡

除國正謝右相啟

殿秋官之屬久矣何功司夏校之規使之為正方英俊  
如林之日在師儒接席之間稽古之榮捫心則愧攷歷  
代賢闕之肇建惟本朝令典之獨詳既律之程度之文

又一以漸摩之行六經聞教雖云博士之可尊五等定規尤藉學官之司正眠班聯而若後在掌教以實均是皆根一學之低昂影諸生之立懦要令多士豈曰友之云乎毋使衆言此非子之座也如某者碌碌不足數負負無可言幸當天下有道之時欲慕古人際可之仕而聲牙萬狀落魄半生一官僅襲於世科三仕未更於選秩慨塵途之蚤涉已分鹽車念舊學之浸荒幾成醬瓿比玷四科之薦墨繼叨兩部之屬員不勝智短之訾深

愜官閒之地嗟再歲事功之蔑有迺一時憂患之相仍  
已甘襍被之行無復彈冠之志荷大鈞播物謂書生習  
氣之尚存而造物救人知薄命嶽巖之可憫陞之學省  
寘彼周行理朝廷清選之班釋堯庫抗塵之職帥以正  
孰敢不正當體厥官自小成以及大成必由乎學茲蓋  
伏遇某官應期王佐驚代人豪身蹈孔孟而得其傳道  
過况雄而守以正事業見乎廊廟合臯謨而謂之嘉勲  
庸著於鼎彝蓋漢庭無出其右每推善以舉類必事君

而以人昔焉起部之趨承已勤薦襴今也成均之聯屬更荷鑄顏某敢不益尊所聞務正諸已思羣居之可樂當學涉之是求重戴憑之席五十餘非敢望也紀何蕃之行踰數事庶幾見之過此以還未知所措

謝從官舉充郡守啟

刺史承流宣化特舉二人君子揚善薦賢猥煩一字惟書生不識時務矧良吏能至中興乃及孤人為之三歎竊謂秦設守郡漢置典州有治理效則以侯爵遷得太

守賢可為斯民賀近世名實之相蔽有司資格之不渝如執券之取償於得人而何有才否奚較政事可知宜曠然大變破拘攣而一新必舉爾所知在選擇而取子欲當明詔可非其人某者顏汗可羞骨凡不化慣平生之跼弛拘薄宦於斗升固雖有意於功名竟亦何能於尺寸蠹長安之粟人已笑其守株濫齊國之筭事蓋宜於掉臂一時奮迅肯羨輩流兩歲編摩自安孤冷匹夫不可以奪志仕者有時乎為貧豈繫牢落之姓名偶在

禁華之記錄惟大夫之宜去二今時則然若諸侯之所  
寶三則吾豈敢不求而得於今有光茲蓋伏遇某官為  
時名臣獨念人物見善如不及詎容按劍之至前舉賢  
惟其能使處囊之自見天子有詔郡國選才顧在列豈  
無雋良何俗士猥先論薦特達至矣古今無之某迹則  
甚寒志當益壯下不負所學固非利祿之使然士相期  
以心要使歲寒之可託

代人賀范同知啟

恭審顯膺帝命擢貳樞庭絲綸之出信萬方爰貴本兵  
之任帷幄之籌勝千里聿觀繼武之功朝有正人國以  
大治共相慶慰竊以北樞垂象接泰階兩兩之光右府  
聯華峻維石巖巖之望將有折衝之效孰先命世之臣  
范蠡致越國之強果能刷恥汲黯寢淮南之計豈謂發  
蒙方清朝載纘於武功而上聖內修於政事咸欣密命  
來畀時英立邦家太平之基有文武兼施之盛恭惟某  
官明堂一柱太廟六瑚節義得君子之閑仁信本大人

之德日光玉潔爛然金薤之文章鳳跼龍蹲偉矣冰壺  
之人物蚤推大冊俯陟巍科聲華既熟於主知位望徑  
躋於禁密輟自甘泉之橐擢分益郡之符人興來暮之  
謠士快爭先之覩我有良翰惟申伯而獨尊賢於長城  
本李勣之善用果聞報政亟被賜環未容祠館之間爰  
趣昕朝之奏宸衷以懌帝渥惟新列西省之近班冠春  
官之清選雖二年留蜀暫希三接之恩而一日還朝當  
拜九遷之命進參宥地入贊廟謨明良既樂於賡歌風

夜不忘於基命伏念某單微末裔冷落孤蹤一官司理  
屬之卑三釜及親聞之養勉修志慮知皆擴而充之仰  
託陶鎔可以無大過矣茲聰明綸之布實增小已之私  
披雲霧而覩青天已驚心目震風雷而知厦屋正賴帡  
幪過此以還未知所措

代王江陰改知饒州謝時相啟

分符偏壘方虞小器之易盈易地名邦敢意殊恩之渚  
至揆庸虛而曷稱冒寵渥以知歸竊惟師帥之良實司

民社之寄處外官而甚重簡上意以特深西漢循良本  
宣帝屢遷之典有唐選任蓋文皇臨遣之恩故耕桑絃  
誦足以致士民之功而賦調租庸可以裕國家之計雖  
大小之不一願休養之惟均自非超詣之才曷副東求  
之意如某者崖枯可棄甕敝莫容荏苒一官雖切簡書  
之畏驅馳三紀曾何毫髮之勤有此謏才豈復榮望昨  
偶叨於錫命俾獲玷於承流甫及瓜時方愧一麾之假  
旋膺芝檢益全五馬之稱初無以小易大之心遽有取

重去輕之得徒有褫輦之懼敢欣出谷之遷自視固已  
歉然始望必不如此凡爾桑榆之景盡歸陶冶之私矧  
是鄱陽介於江左薰陶至化率皆君子之歸詎勉農時  
不墮小民之業濟濟類菁莪之育穰穰有貨食之餘乃  
以繆庸獲茲安便茲蓋伏遇某官德熙帝載道格天心  
立太平之基在闡闔弛張之頃建惟和之政得彌縫輔  
相之機載登宰府之班每務大臣之義致茲孱瑣亦預  
選掄某敢不運甓修勞著鞭期進震風雷而知懼正有

賴於陶鎔計日月以為功尚庶幾於官政

代知縣作啟

謏薄奚堪幸聯班於京秩寵榮洊至俾宣化於男邦雖  
出谷之既遷顧循涯之曷稱撫躬增愧感德知歸竊以  
治衆帥民事蓋詳於百里量材定位職尤謹於一時或  
勵以詔旨而敢怠於承休或易以諫言而益兼於善後  
非才因濟厥用匪輕如宓賤不羣乃大鳴絃之政儻尹  
何未學當虞製錦之傷仰惟清朝具存成憲假徽章而

示寵昭厚賞以勸功凡茲授受之間率自選掄而至豈  
容蒙陋獲玷使令如某者帚敝可捐崖枯已瘠技平平  
而孰取志落落以難成適三仕三已之初敢萌喜愠當  
再戰再屈之後獨笑間闕莅官踰必世之年歷任有過  
旬之考彈冠入仕空嗟髀肉之生結柳送窮更嗟食羹  
之覆迤邐萬狀夷險百為固知退尺進寸之難尤昧斲  
方為圓之巧歟浮沈於宦海徒進退於銓曹矧此上元  
密承大府獄訟關決之來而首司其責簿書期會之至

而獨處其繁式裨天塹之防兼贊軍屯之給何期五技  
使長一同盡歸特達之知蔑有游談之助望不及此得  
之歉然茲蓋伏遇某官勲列鼎彝祥參奎壁仁義禮智  
生於色而根於心道德忠誠盛於內而賁於外燦經邦  
之事業大濟世之規模躬持萬物之衡大布一陶之冶  
除吏八百不專崔氏之親薦士三千盡用裴公之疏路  
慶公忠之聞人無競躁之求至此庸愚亦叨甄錄某敢  
不力勉未至求為可知治悉本於七條政當期於三異

戴星而問王事願致其勤束帶而見督郵其誰敢後過此以往未知所裁

代人為女回定啟

通經拜命恩蓋侈於衛姬合姓為婚已獨慚於齊偶猥蒙才子許畀嘉音伏承某人神氣以靈蚤決科於拾芥而某人德容有愧未開禮於采蘋不圖過聽之勤誤辱好逑之選粉榆幸接聲氣益同孟子陳戒女之言敢忘順正韓子責成人之禮尚覲典型庸致幣將莫遑瓊報

代人言定啟

同官為寮夙厚雷陳之好合姓繼世更交劉范之歡諏  
吉著龜介言媒妁某人偶聞詩禮自期非小人儒伏承  
某人蚤習組紉可謂彼君子女不圖過聽之誤俯從好  
匹之求幸偶齊姜莫如韓樂能修法度式觀蘋藻之可  
承宜爾室家行慶子孫之逢吉敬將末幣具載別牋

東塘集卷十七

欽定四庫全書

東塘集卷十八

記

紹興府進士題名記

晉史謂會稽有佳山水名士多居之王羲之晚渡浙江  
遂有終焉之志顧愷之謂千巖萬壑競秀爭流而一時  
人物如孫綽李充賀循許詢輩皆以文藝冠世某幼讀  
史長而從仕謂今會稽實拱行闕仕而有職於東蓋無

難者亦庶幾見所謂以山水名天下與人物風流之盛者乎而宦海萍游迄三十年而志弗遂淳熙十六年春辱乘傳典倉事於是登秦望探禹穴識其委蛇盤礴之觀而得其溫厚粹美之氣蓋其鍾靈孕秀雲行川流胚胎醞釀發而爲英傑宜有獨盛於斯世者宋朝崇儒右文眠古爲重而東南儒風宏懋盛美會稽爲最焉杜祁公以道德文章功業行實克相昭陵德在生民勲在史冊足以儀萬世而垂後學如顧公臨典制北門陳公揚

庭執法中司傅公墨卿正位常伯石公景畧皆以文學  
冠春官夏公噩齊公棠皆以賢良應大科傅公崧卿以  
文藝魁舍選儒學之秀頡頏上下此非騫翔奮厲之所  
蘊而雄深秀麗之所鍾耶建炎初六飛渡江嘗駐蹕於  
越而越今爲陪都蓋古三輔也山川之所形見風化之  
所漸被其儒風士業流聞彰布益以昌大要非餘郡可  
及王公佐詹公駸相望二十餘年之間皆以大策冠多  
士石公轍以奏恩被魁選莫公叔光以宏博中兩科而

三歲大比賜第於太常者亡慮十餘人其連取詞科伯仲聯第者又間見層出人物之茂實爲衣冠盛世其亦有以權輿於此哉郡之前進士石朝英陸洋張澤闔辭以告某曰越之山川則有郡之圖志在越之名卿大夫則有國之信史在若無俟於登載者然鄉之宗老則懼晚學之未聞也人寢遠而寢亡事愈久而愈墜其不沒前人之事者幾希朝英等將以郡之進士列名於石且請於府帥閣學尚書王公願飭工鑱石寘諸郡庠之講

堂於以示勸激之意然非文不傳也敢以請某幸以將  
指來越而楚實有材又所身見而目識者其何可辭則  
與之言曰夫讀古人之書肄當世之業豈直以取科級  
釣爵位以誇榮侈盛於鄉曲哉其致君澤民行道及物  
實自讀書肄業始漢世設科射策勸以官祿史氏譏之  
韋氏教子一經志於青紫後世貶焉士之學固有遠者  
大者今天子龍飛御天適當興賢之歲越之士方將企  
前慕昔以接踵賢躅而振袂流風者其盍思所以遠者

大者乎雖然越有君子六千人昔人謂其有志行猶齊之士吳之賢良也嗚呼千載之後其必有仍盛美於前人者某猶拭目以觀之題名起於慶厯二年前乎此者攷諸登科記則鄉里多不載故不錄而杜祁公則大中祥符元年甲科四名進士蓋可攷云

涇縣尉廳壁記

州縣之職其甚卑而勞者曰尉尉非能卑人人卑之而不爲也尉之與民相親也相安也相親而民聽之相安

而民悅之不親則悖不安則感矣尉而非其人可乎今而曰卑之而吾弗爲嗚呼尉之真可卑也楊君堪奉刺史命假尉於涇邑其胷中淳涵者厚而粹乃肯托諸尉職而爲相親安於民之事以小施所學焉亦賢已哉伐石以紀前人記壁以告來者是重尉也非重文也

池州弄水亭記

淳熙七年四月十日池州弄水亭成郡太守袁某賦詩載酒輯賓佐以落之存古也大江之東池澤上流山川

之融峙險阻之捍扼視古形勢國也而層巖絕壁變態萬狀風月之所盤礴溪浦之所漩渢者昔亦聞于四方矣唐二百年郡刺史多時名公至於騷人雅士游觀登覽觴詠繾綣皆油然意足欲將終身焉所遇足以發其趣也李太白傲睨一世其襟度飄放未易即之而惓惓者何哉秋浦之詩白筇陂之詩愛賞悲歌之念後世誦之意池非人間世也後有即秋浦勝地而亭者取太白秋浦詩飲弄水中月之句而以弄水名焉會昌中刺史

杜牧之爲詩二章其言草木組麗風露光潔山溪幽足  
四時異趣亭不勝其景也然歲月既久而陵谷之遂變  
古今異時而名實之事件矣何獨斯亭哉唐至今三百  
年亭之實未可復而亭之名其庶幾存乎先是紹興八  
年郡將復舊觀而故址在今青溪橋之西南岸壤傾落  
莽爲汙池而又佛廬其旁觸目蕪圯弗容以故事攷獨  
存蓮浦亦彫謝岑寂蓋牧之所謂颺灑翠綃舞者今睹  
其細爾僅能因仍簡陋即南城之外沿西牆甫十步臨

清溪以亭之而基制宏甚屢壓于水淳熙四年郡復改  
創累石壙土無復懷水慮居亡何悉從煨燼又三年某  
來爲郡誦太白牧之之詩想其高風雅尚屢意此邦慨  
二賢之不可見也儻循其名以存大畧不亦可乎遂因  
其址而規焉亭傾牆面北鄉與溪山殊不相偶又東以  
狹壤施置失宜迺拓基架屋而南之中爲大亭三間其  
高二尋軒宇導從映照後先連甃如砥弗限高下庖傳  
有所髹飾惟備由亭之東爲橋十有一柱折而北焉至

南城門而止齊山屏其前九華翼其左清溪頰流不疾  
不徐蕩漾潺湲迫岸而弗敢進風日凝美波光層接殆  
鬚眉可燭也西有飛橋其長三十丈因而葺之垂虹倒  
影又將季孟於松江矣經始於三月五日一錢不取於  
民而朽梓之工悉計直以授纔四十日而後休邦人亦  
詫偉特之觀其驟見於此也雖然是足以存古矣夫因  
亭以立名循名而探理吾不知水之有似於人者乎澄  
之而不清撓之而不濁吾知人之隘而汙者將汙顏於

此水也源深而流長波靜而光徹吾知人之淺而躁者將汗顏於此水也水何心於人而人不能以遜於水人何預於水而水足以愧乎人太守之登斯亭弄斯水也其必有以鑒此水者乎不然水哉何取於水也故併書之因以爲戒云

惠補之檇室記

惠子補之作環堵之室而名以檇惠子有愛乎檇而自況者也或曰萬物以有用貴而無用者莫如檇萬物以成

材稱而不材者莫如樗是何惠子之愛乎樗也惠子讀書三十年成寐遽覺油然惟文史之適而山深林密居弗於朝市褰衣博帶竊有志於先生長者之習益又絜其餘力以自放於詩歌嘲感之際章聯句輯意澹辭雅嘗見於鄉里朋友者時足以自寫風味仰而事其上親且六十而其下亦有妻子之累惠子之才於時殆非無所可用者也彼又安能自樂於無用而欲稅駕於擁腫之樗哉余曰物不可使有窮也而物之窮者以有用無

爲名尸用於名則窮無爲謀府用於謀則窮無爲事任  
用於事則窮無爲知主用於知則窮不然顧豈祖槩橘  
柚而後窮於剥辱折泄之用哉君子之道務養其大者  
而他所不暇問簞食瓢飲若落落與人異而三年使有  
勇者殆表表不少遜夫使回也而有用且得有此大也  
耶惠子以性爲根以道爲餘文之以爲枝葉成之以爲  
華實曲而扶之直偃而使之立風雨之而不折寒暑焉  
而不傷無用而用莫我窮不材而材莫我累君子之養

其大惠子之愛乎擣余固知之矣余方宦游怵怵餬其口於四方間闕百罹殆自可歎以我眡子所得孰多哉子盍爲我思焉猶及其拱把而封之至於子之擣而後可也

池州清淨寮記

天下本無事智者過之而察愚者不及而惑不察不惑而天下之事定矣余吏州縣十五年蓋嘗投諸膠擾之地靜而觀其變焉已迺繁者可一而禁者可擢何哉於

其理弗於其事也今州縣無壯民有點吏無拙政有能  
稱無瘠肥人之心有以隣爲壑之意天下之事始紛紛  
於此矣而豈獨一州縣哉余來爲池州池民富不能以  
疆地不足以廣而貧者嗇耕者瘠殆衣食怵怵弗皇暇  
其眎官府亦瑟縮無敢肆而見謂囂訟者猶能以理格  
是不可以無事治耶夫投尺寸紙側立墀下太守操筆  
疾書民得其說即去郡責期以竟守既自責又以責爲  
令者是非白而民退聽矣顧一落吏手即其說支而難

窮余不敢爲也而比歲郡國病弗給者殆什七池如小民家雖居處服食若不足以振耀而父兄子弟猶能相期於一飽若太守者亦安用求餘也嗟乎果不可以無事治耶余既知池之民而民亦知余之心上作而下應此定而彼佚天下本無事也昔者曹參治齊蓋公爲言治道貴清淨所以基無事也一水之澄而須眉可燭萬籟既息而天機自見清淨之效如此而何以多事爲哉因書其說而葺郡治之東室名之曰清淨寮繼此其必

有仍盛於相國者顧余何足以知之

陳氏捨田道場山記

湖州道場山聚衆萬指異時迫弗瞻其徒乞食以居權  
羸較乏歲愁以懼而學之勤弛蓋未遑詰也衆病之年  
來住山多名禪熟緣法飽心計有以挾佛力而撼檀施  
者於是膏腴之田願陪佛供金錢之入願置沃壤衍裕  
饒足日有餘力其禪足以學矣淳熙丙午有保義郎新  
監行在豐儲西倉陳泌者施錢踰百萬市田百畝於路

村而告方丈隨侃曰歲九月十日其爲我設冥陽供齋  
無碍僧以薦先室趙氏救護幽途使大無畏隨侃歡喜  
懺禮對佛作證而囑湖之寓客袁某爲之記曰佛流中  
華歲千二百教孚東南盛於二浙湖在吳右叢林蔽崗  
維今道場開山自唐精藍千楹毳納萬指朝餐夕粥斗  
儲勺累歲弗遑瞻緇流興嗟云何一飽立茲僧伽爾時  
祖師循方乞食豈無衆生捨貪施得住山隨侃說無上  
緣堂殿有供郊垌有田誰曰旨哉實善知識諸方影附

檀施雲集倉人陳氏發菩提心市田百畝捐百萬金一  
念熏修無漏善故薦我室靈出纏離苦我聞圓覺譬如  
苗增言念此田助其幽冥又聞楞嚴蒸石成飯言念此  
田成彼善願稽首大眾十鉢一盂趺坐飽食當讚幽塗  
稽首佛慈已滅生滅鑒茲福田願破迷惑維山蒼蒼維  
田穰穰我爲斯文式慰爾亡

序

擇善易解序

易之爲書與天地準更三聖而後備學之者可以無過  
焉閎衍微深蘊奧難見非博學君子明陰陽變化之用  
者焉能探其妙旨哉昔王通講道河汾推明六經之旨  
自謂吾之贊易述而不論嗚呼通尚然也弗如者其曰  
能乎然考古驗今釋其言而解其義者亦云富矣京房  
丁寬梁丘費直之輩皆博通易道傑然穎出於西都不  
幸其文逸亡其後王弼孔穎達又相繼而顯焉列於今  
而不泯暨於我宋以右文興治教化茂行二百五六十

年之內英才俊士名世巨儒日以彙征多本經誼若王  
程龔耿數公又皆精通於易而得於奧旨也吁繇古逮  
今明易者不爲不衆矣然予於此亦不得無言焉且易  
之所以爲易者不外卦辭爻辭彖辭象辭文言繫辭無  
而爲易皆聖人所作也雖其旨趣意義微奧難明亦不  
過一說而已曷嘗有二哉奈何古今學者類皆索奇求  
異各持一說欲無同於人以騁一己之學殊異立言紛  
然不合於理者有之悖於理者有之遂致聖人一經之

意雜然不可考後之學者自是無所據矣且訟復即命  
渝安貞吉此訟卦九四爻言也輔嗣孔氏釋之曰訟既  
不勝若能反從本理渝變往前爭訟之命即得安居貞  
吉此一說也若東坡則釋之曰九四所當得者初六而  
已近於三而強求之故亦不克訟然而有初之應即而  
就其命之所當得者自改而安其政則不失其有此二  
說不同也至於伊川則釋之曰四以剛陽而居健體無  
與爲敵則訟無由而興故不克訟夫以剛健而不中所

以好訟若義不克訟反就正理變而安貞則吉此三說不同也至若耿氏則釋之曰九四不克訟以剛訟柔其義不克而復即九五聽者之命變而安則吉此四說不同也夫一爻之間不踰數句而其意亦不過一而已諸儒釋之各立異見若圓冠方履之不侔聖人作之之意果安在哉由此觀之則餘解之相異可不言而喻矣予嘗求諸儒訓釋之文以尋奧義見其彼此角立議論糾紛不歸於一汨於胷中因釋其當於理明於道優於諸

解者萃聚其說爲一帙庶可論歸於一而予亦得以一其心也否則將信彼歟將信此歟異時之不一其害豈小哉雖然予學不逮人則焉能見衆說是與否也然嘗受教親庭矣故於此不自卑遜而掇取其當者以集之想後之君子得是書以觀之則知予集之之際不妄亂也若夫春秋一經聖人褒善貶惡之書也左氏自爲傳而公羊穀梁又各爲傳後世學者方之六經並行也唐盧仝以學高世刻意春秋乃東三傳獨抱遺經豈非厭

傳注之說穿鑿不根有激而云哉夫盧仝盡棄三傳獨以經爲宗予求以明經而不敢盡廢其解予之學誠下於仝一等矣然漢劉歆謂學者信口說而背傳說是末師而非往古蓋自秦火以來殘編斷簡幸有存者傳說之功也或者必欲盡廢之而獨探微言則朽折之餘蓋亦難矣況支離異同之患有甚於朽折乎則是書也其罪我乎其知我乎必有論定者矣不然儒者以六經爲法乃累世不能通其學窮年不能究其理則太史公即

有甚憂者孔子嘗曰多聞擇其善者而從之多見而識之知之次也予於是書目曰擇善易解云

成都文類序

天地之祕藏發而爲名山大川山川之秀靈驗而爲文章華藻二者相爲頡頏而光明者也兩京三都之賦摹寫天地繪繡山川絢道德揆天庭潤金石諧韶濩與乾坤造化周流盛大於宇宙之間千百萬世下而知有兩京三都者以此文也然則天地山川而可無此文哉而

可以不傳此文哉益古大都會也有江山之雄有文物之盛奇觀絕景僊游神跡一草一木一丘一壑名公才士騷人墨客窺奇吐芳聲流文暢散落人間何可一二數也凡此者予來三年亦既畧覩矣或曰兩京三都以賦而傳使無傳焉斯文泯矣然則由漢以來其文以益而作者今獨無傳可乎有益都斯有此文此文傳益都亦傳矣爰屬僚士撫方策哀諸碑識流傳之所膾炙友士之所見聞大篇雄章英詞綺語折法度極眩耀其以

益而聞者悉登載而彙輯焉斷自漢以下迄於淳熙其  
文篇凡一千有奇類爲十一目釐爲五十卷益之文滋  
備矣嗟乎後世之士豈無浮沅湘由巴蜀畧邛笮如司  
馬子長者乎豈無上瞿唐過夔梓賦雪錦如杜少陵者  
乎又豈無自西蜀歷荆楚棲遲山水間如田游巖者乎  
儻得如二三公者而訪斯益肇斯文焉則知清寧闔關  
至大至廣之內而有所謂蜀蜀六十州亘五千里之內  
而有所謂益益都無量江漢炳靈之內而有所謂文者

其不在此書乎是書也而有傳焉庶幾乎無負於益慶  
元五年二月望日

成都志序

成都蜀大都會也山林川澤丘陵墳衍原隰之名物如  
周大司徒職方氏所掌宜有方志以詒後來異時郡侯  
亦各登載唐白敏中始爲成都記五卷本朝趙清獻公  
爲成都古今記三十卷相望今數百年陵谷之變已不  
同而物與時偕湮廢增益又未已也後有續記者而會

萃後先各立程度互見重出所聞異同殆凡數書矣擘  
者不復一見而盡或者病焉某來守踰年暇日賓客有  
曰今天下郡國悉有志願以蜀大都會而獨弗備誠缺  
文哉乃命幕僚摭拾編次胚胎乎白趙之記而枝葉於  
續記之書剔繁攷實訂其不合而附益其所未備臚分  
彙輯稽倣古志凡山川地域生齒貢賦古今人物上下  
千百載間其因革廢興皆聚此書矣雖然竊於此有感  
焉是邦也昔也風土之阜繁民生之富庶考之志可見

已今閭閻無巨室田野無饒民商者多乏絕耕者半轉徙公不能以裕私下不足以供上燉燉然銷膏以火而不自知也可乎哉聖明在上顧憂西南日議所以寬民輸蠲估賦培植其元氣而鍼砭其膏肓是志也又將以寬大之詔什一之制而大書特書焉則有俟乎後之作者慶元己未孟秋望日

白雲先生集序

某頃守臨安老兵宿吏猶能記其父祖時事則指凡官

府曰此紹興初季待制所建置者某旋貳地官因閱故牘則又見減免下戶役錢之法則曰此季待制建議也某晚學而企瞻前修顧何幸乃獲踵英躅於六十載之後今又再拜三復先生之文是將以仕學使學者咸有取則焉造物之惠某者亦悉矣故嘗論士大夫之學非欲以誇辭藻釣名譽干祿爵取富貴以自華其身必取於有用也汲黯用於直蕭望之用於傳魏徵用於諫劉蕡用於對此真士大夫之學也先生受高廟深知既從

甘泉方論諫十數上朝奏暮黜畧不少貶焉而卒以壽  
一時之脈此學也非文也某撫卷太息爲之竦然

成都府太守圖像冊序

士大夫非一時毀譽爲可信而數十百年以至於愈久  
愈遠其毀譽乃可信也蘇文忠公見王元之繪像想其  
流風餘烈願執鞭而不可得此豈一時之譽哉昔也敬  
其人今覩其像而益知所敬者以愈久愈遠而愈信也  
余來成都暇日過清陰館見府尹繪像蓋自漢以來至

於今所謂執鞭欣慕者何可一二數嗚呼是真有可信者矣余慮屋壁將壓何以傳遠迺更繪以繒而冊藏之隸於司府帑者雖然予將解組而去圖寫正未能就而一時毀譽亦不能免譽生於愛毀生於怨譽固益美而毀亦余藥石也余烏得而盡知之哉他人烏得而遽信之哉數十百年又當有真毀者出焉因記冊首庸以自警且告來者

送趙運使赴名序

某聞自昔人有贈言之說而後世君子於論交之間凡道義之契苟有行焉皆得以言贈蓋其情親氣合不得已於此而寓其繾綣不忘之意是道也禮不足而情有餘施之等輩則爲勸行之先生長者則爲薄是故不可以不審某曰不然文所以宣意而意所以達理耳使文道其意意適其理而無失乎贈言之意則又何禮之拘今都運寶文檢正郎中被天子詔將歸京師與四海赤子興大福利夫豈徒然耶於先生之行也誦古今道盛

德蓋不知幾何人而某也介乎其間獨不欲以亡益之  
辭而塞贈言之責其果何說哉人之言曰先生文章言  
論貫穿今昔咀華涉源盡得前人道學之要蓋異乎析  
章句而工文字是知乎先生之學也於贈焉其何知又  
曰先生義根於心道形於色行不爲隨志不務合蓋在  
昔道義之士不爲他奇以求異者是知乎先生之行也  
於贈也亦何知則又曰先生持使者節幸江城暮年矣  
長善救失靡所不至而收錄成就必自其孤遠者先之

至於勢迫而權取者舉瑟縮不與是知乎先生之公也  
於贈焉亦何知夫是三者於贈之意不足而切切然以  
稱咏爲美先生何樂乎此哉然則某將何以告蓋又聞  
之古之聖人立天下之事在乎審而審之道以謀始爲  
最始之弗審後將難收越之人有將之楚者必深推其  
故而後發以謂楚之果有利於我也吾然後行不然適  
乎楚而事乃戾焉吾故甘於還越也果能安於楚之害  
而拱受乎是故越之人必求其百全之利而後動謀之

詳計之熟則可一去而不復阻推而至於朝廷之上而有類乎是者則亦烏可遽爲之說哉孟子曰量敵而後進慮勝而後會孟施舍猶持此以固其勇不此之慮而決於未必然之策而謂之能行也可乎先生將不辰浹侍清閒之燕歷天下事而敢言之先生必無憚此也贈言之勸以忠而不諛某也門下士不敢不告

送元直歸毗陵序

甲申年余過常之湖汭居而張子正適在焉子正於余

契家而又同所寓意可朝夕見也然月率一見竟數語  
即去願徵逐詎不可得余怪而訊諸鄰其鄰曰是公却  
掃閉門課諸子誦書暮則父子共燈火夜漏過分矻矻  
不肯罷他事弗遑恤也而又奚顧賓客哉余愧且太息  
知其子必已奮迅傑立是足為子弟瑞者後數月見子正  
令子元直與其季踉蹌出揖眉宇炯炯然猶牛角有小  
兒態至問讀書事二子皆交口誦念如聞老師宿儒語  
者余益知古人摘領髭事要必在二子居亡何子正浮

家旁郡余亦急急西上蓋今八年矣癸巳秋遂見元直  
於博士梁君家且曰僕以易一經求正於大學博士日  
課大義一小義二題意三四又道易中旨意皆歷歷中  
程度似不專作舉子計者又出所自爲義一帙筆力縱  
肆左右馳騁不類後生語余覘然益奇之知其真有志  
者也自是稍有暇必過元直元直亦遇晚休過鬪書相  
上下語移時往往不及俗事如是亦兩閱月元直今將  
去是而歸毗陵因袖所知鄉先生序文一卷來曰願君

亦有識也余曰善學者以其所志也學而遡其所未學則志意廣而大有功如川之方至也混混乎晝夜之不  
舍也源源乎中國之經營也不然吾見其盈科也而防  
之吾見其激潁也而注之則泄泄乎日放而不留也沚  
沚乎日流而將窮也夫惟志愈厲而日進業愈進而日  
精功愈崇而日新不見其停不聞其盈嗚呼元直其有  
樂乎此也耶其無樂乎此也耶

東塘集卷十八